

〔宋〕

許叔微

著述

傷寒九十



中國醫學大成

傷寒九十論提要

宋白沙許叔微撰。張氏月霄藏書志著錄。有傷寒九十論。厥後清咸豐癸丑。仁和胡心耘編校琳瑯秘室叢書。用活字板印行。其第二集有愛日精廬傳鈔本傷寒九十論一卷。光緒丙申。四明陳隆澤重刻求志居醫學叢書。乃初集五種宋本之一。民元孟夏。雙流黃氏濟忠堂再刻於成都。本書據三書互校鉛槧。乃宋許叔微治傷寒九十證驗案。每列一證。先列病人姓名。次詳證狀。次論病理。次論療法。用藥方義。剖析詳明。諸家舊目。多未著錄。四庫亦未收採。惟陳振孫書目有叔微傷寒治法八十一篇。未知卽此書否。嘗讀叔微書。屬辭簡雅。不諧於俗。故自明至清。不多傳佈。是則因傳本稀少。故藏書家多未之見。茲爲流傳古書起見。已將叔微本書方正續編。刊入本集方劑類。再將十萬卷樓叢書之傷寒發微論。傷寒百證

傷寒九十論 提要

二

歌註。校補闕字。續刊本書之後。凡平時不易單購之書。皆得廣傳於醫界矣。

傷寒九十論目錄

辨桂枝湯用芍藥證第一	一
桂枝加附子湯證第二	二
桂枝加厚朴杏子湯證第三	三
麻黃湯證第四	四
大青龍湯證第五	五
陽明可下證第六	六
陽明蜜兌證第七	七
腎虛陽脫證第八	八

臍中出血證第九	九
陰中伏陽證第十	一〇
傷寒暴死證第十一	一一
夜間不眠證第十二	一二
大柴胡湯證第十三	一二
陽明急下證第十四	一三
傷寒自解證第十五	一四
熱入血室證第十六	一五
筋惕肉瞤證第十七	一六

陽明當下證第十八·····	一七
桂枝加葛根湯證第十九·····	一八
葛根湯證第二十·····	一八
剛瘕證第二十一·····	一九
厥陰證第二十二·····	一九
太陰證第二十三·····	二〇
太陽中暍證第二十四·····	二一
指甲黑青證第二十五·····	二二
瞪目直視證第二十六·····	二三
舌卷囊縮證第二十七·····	二三
循衣摸牀證第二十八·····	二四

邪入大經證第二十九·····	二四
太陽桂枝證第三十·····	二五
桂枝證第三十一·····	二七
少陰證第三十二·····	二八
少陽證第三十三·····	二九
兩感證第三十四·····	三〇
三陽合病證第三十五·····	三一
白虎加人參湯證第三十	
六·····	三一
發熱惡寒證第三十七·····	三二
結胸可下證第三十八·····	三三

結胸可灸證第三十九	三四
汗後吃逆證第四十	三四
漏風證第四十一	三五
小便出血證第四十二	三五
妊娠傷寒脚腫證第四十	

三……………三六

風溫證第四十四	三六
狐惑證第四十五	三七
發黃證第四十六	三八
溼家發黃家證第四十七	三八
黃入清道證第四十八	三九

先汗後下證第四十九	四〇
太陽瘀血證第五十	四〇
陰病陽脈證第五十一	四一
辨少陰脈緊證第五十二	四二
青筋牽引證第五十三	四三
下膿血證第五十四	四四
刺陽明證第五十五	四五
陰陽交證第五十六	四六
陰陽易證第五十七	四六
又手冒心證第五十八	四七
傷寒耳聾證第五十九	四七

揚手蹠足證第六十·····	四八
遺尿證第六十一·····	四九
舌上滑胎證第六十二·····	四九
衄血證第六十三·····	五〇
傷寒脅痛證第六十四·····	五〇
傷寒溫瘧證第六十五·····	五一
發斑證第六十六·····	五三
臟結證第六十七·····	五四
陽結證第六十八·····	五四
傷寒協熱利證第六十九·····	五六
胃熱嘔吐證第七十·····	五六

霍亂轉筋證第七十一·····	五七
兩脛逆冷證第七十二·····	五七
汗後勞復證第七十三·····	五八
汗後瘡瘍證第七十四·····	五九
面垢惡寒證第七十五·····	六〇
傷寒下利證第七十六·····	六〇
傷寒閉目證第七十七·····	六一
傷寒表實證第七十八·····	六二
手足逆冷證第七十九·····	六三
寒熱類傷寒證第八十·····	六四
失汗衄血證第八十一·····	六六

脾約證第八十二·····	六七
格陽關陰證第八十三·····	六八
太陽陽明合病證第八十	
四·····	七〇
懊憹怫鬱證第八十五·····	七一
兩手撮空證第八十六·····	七三

下利服承氣湯證第八十	
七·····	七四
濕溫證第八十八·····	七五
血結胸證第八十九·····	七六
六陽俱絕證第九十·····	七七

傷寒九十論目錄

傷寒九十論

宋 白沙 知可許叔微著述

鄞縣 曹赤電炳章校點

辯桂枝湯用芍藥證第一

馬亨道庚戌春。病發熱頭疼。鼻鳴惡心。自汗惡風。宛然桂枝證也。時賊馬破儀真三日矣。市無芍藥。自詣圃園採芍藥以利劑。一醫曰。此赤芍藥耳。安可用也。予曰。此正當用。再啜而微汗解。

論曰。仲景桂枝加減法。十有九證。但云芍藥。聖惠方皆稱赤芍藥。孫尙藥方。皆曰白芍藥。聖惠方。太宗朝翰林王懷隱編集。孫兆爲國朝醫師。不應如此背戾。然赤

者利。白者補。予嘗以此難名醫。皆愕然失措。謹案神農本草。稱芍藥主邪氣腹痛。利小便。通順血脈。利膀胱大小腸。時行寒熱。則全是赤芍藥也。又桂枝第九證云。微寒者去赤芍藥。蓋懼芍藥之寒也。惟芍藥甘草湯一證。云白芍藥。謂其兩脛拘急。血寒也。故用白芍藥以補。非此症也。素問云。濡者陽氣有餘也。陽氣有餘爲身熱無汗。陰氣有餘爲多汗身寒。傷寒脈濇。無汗。蓋邪中陰氣。故陽有餘。非麻黃不能發散。中風脈滑。多汗身寒。蓋邪中陽氣。故陰有餘。非赤芍藥不能劫其陰邪。然則桂枝用芍藥。赤者明矣。當參百證歌。

桂枝加附子湯證第二

有一李姓士人。得太陽因汗後汗不止。惡風小便澀。足攣曲而不伸。予診其脈。浮而大。浮爲風。大爲虛。此證桂枝湯第七證也。仲景云。太陽病發汗。遂漏不止。其人

惡風。小便難。四肢微急。難以屈伸者。桂枝加附子。三投而汗止。再投以芍藥甘草。而足得伸。數日愈。

論曰。仲景第十六證云。傷寒脈浮。自汗出。小便數。心煩微惡寒。脚攣急。反與桂枝湯以攻其表。此誤也。得之便厥。咽中乾。煩躁吐逆者。作甘草乾薑湯。若厥愈足溫者。更作芍藥甘草湯與之。其脚卽伸。若胃氣不和。譫語者。少與調胃承氣湯。蓋第七證則爲發汗漏不止。小便難。第十六證則爲自汗小便數。故仲景於證候紛紛小變異。便變法以治之。故於湯不可不謹。

桂枝加厚朴杏子湯證第二

戊申正月。有一武弁。在儀真爲張遇所虜。日夕置於舟艙板下。不勝陰伏。後數日得脫。因飽食解衣捫蝨以自快。次日遂作傷寒。醫者以因飽食傷而下之一醫以

解衣中邪而汗之。雜治數日。漸覺昏困。上喘息高。醫者愴惶。罔知所指。予診之曰。太陽病下之。表未解微喘者。桂枝加厚朴杏子湯。此仲景法也。醫者爭曰。某平生不曾用桂枝。况此藥熱。安可愈喘。予曰。非汝所知也。一投而喘定。再投而濺濺汗出。至晚身涼而脈已和矣。醫者曰。予不知仲景之法。其神如此。豈誑惑後世也哉。人自寡學。無以發明耳。

麻黃湯證第四

鄉人邱忠臣。寓毗陵薦福寺。病傷寒。予爲診。視其發熱頭疼煩渴。脈雖浮數無力。自尺以下不至。予曰。雖麻黃證而尺遲弱。仲景云。尺中遲者。營氣不足。血氣微少。未可發汗。予於建中湯加當歸黃芪令飲之。翌日病者不耐。其家曉夜督發汗藥。其言至不遜。予以鄉人隱忍之。但以建中調理而已。及六七日。尺脈方應。遂投以

麻黃湯。啜第二服。狂言煩躁。且悶。須臾稍定。已中汗矣。五日愈。論曰。仲景雖云不避晨夜。卽宜便治。醫者亦須顧其表裏虛實。待其時日。若不循次第。雖暫時得安。虧損五臟。以促壽限。何足尙哉。昔范雲爲陳霸先屬。霸先有九錫之命。期在旦夕矣。雲偶感寒疾。恐不及預盛事。請徐文伯診視之。懇曰。便可得愈乎。文伯曰。便差甚易。但恐二年後。不復起爾。雲曰。朝聞道。夕死可矣。况二年乎。文伯以火燒地。布桃柏葉。設席置臥其上。頃刻汗解。以溫粉撲之。翌日愈。甚喜。文伯曰。不足喜也。後二年果卒矣。夫取汗先期而促壽限。况不顧表裏。不待時日。便欲速愈乎。毋見病家不耐三四日。晝夜促汗。醫者顧利。恐別更醫。隨情順意。鮮不致斃。故書此以爲龜鑒。

大青龍湯證第五

何保義從王太尉軍中得傷寒。脈浮濇而緊。予曰。若頭疼發熱。惡風無汗。則麻黃證也。煩躁則青龍湯證也。何曰。今煩躁甚。予投以大青龍湯。三投汗解。

論曰。桂枝麻黃青龍。皆表證發汗藥。而桂枝治汗出惡風。麻黃治無汗惡寒。青龍治無汗而煩。三者皆欲微汗解。若汗多亡陽爲虛。則煩躁不眠也。

陽明可下證第六

一武弁李姓。在宣化作警。傷寒五六日矣。鎮無醫。抵郡召予。予診視之曰。脈洪大而長。大便不通。身熱無汗。此陽明證也。須下。病家曰。病者年踰七十。恐不可下。予曰。熱邪毒氣。併畜於陽明。況陽明經絡。多血少氣。不問老壯當下。不爾別請醫治。主病者曰。審可下。一聽所治。予以大承氣湯。半日殊未知。診其病。察其證。宛然在。予曰。藥曾盡否。主者曰。恐氣弱不禁。但服其半耳。予曰。再作一服。親視飲之。不半

時間。索溺器。先下燥糞十數枚。次澹洩一行。穢不可近。未幾已中汗矣。灑然周身。一時頃汗止身涼。諸苦遂除。次日予自鎮歸。病人索補劑。予曰。服大承氣湯得差。不宜服補劑。補則熱仍復。自此但食粥旬日可也。故予治此疾終身。止大承氣一服而愈。未有若此之捷。

論曰。老壯者形氣也。寒熱者病邪也。臟有熱毒。雖衰年亦可下。藏有寒邪。雖壯年亦可溫。要之與病相當耳。失此是致速斃也。謹之。

陽明蜜兌證第七

庚戌仲春。艾道先染傷寒。近旬日。熱而自汗。大便不通。小便如常。神昏多睡。診其脈。長大而虛。予曰。陽明證也。乃兄景先曰。舍弟全似李大夫證。又屬陽明。莫可行承氣否。予曰。雖爲陽明。此證不可下。仲景陽明自汗。小便利者。爲津液內竭。雖堅

不可攻。宜蜜兌導之。作三劑。三易之。先下燥糞。次洩滯。已而汗解。

論曰。二陽明證雖相似。然自汗小便利者。不可蕩滌五臟。爲無津液也。然則傷寒大證相似。脈與證稍異。通變爲要。仔細斟酌。正如以格局看命。雖年月日時皆同。貴賤窮通不相侔者。於一時之頃。又有淺深也。

腎虛陽脫證第八

朱保義撫辰。庚戌春權監務。於一日就務謁之。見擁爐忍痛若不禁狀。予問所苦。小腸氣痛。求予診之。予曰。六脈虛浮而緊。非但小腸氣。恐別生他疾。越數日再往。臥病已五日矣。入其室。見一市醫孫尙者供藥。予診之曰。此陰毒證。腎虛陽脫。脈無根蒂。獨見於皮膚。黃帝所謂懸絕。仲景所謂瞥如羹上肥也。早晚喘急。未幾而息已高矣。孫生尙與朮附湯。灸臍下。予曰。雖虛扁之妙無及矣。是夕死。故論傷寒。